

24 March 2025

समे .18:15 Hrs

<><><><><>

Headlines

- मुख्मन्त्री उमर अब्दुल्ला होरें आखेआ ऐ जे आतंकवाद गी खत्म करना बिजन लोकें दे सहयोग दे नामुमकिन ऐ।
- मुख्मन्त्री होरें आखेआ जे 144 करोड़ रपे बन्ने पर तारबंदी लेई मुआवजे दे तौर पर लोकें गी देई दिक्ती गेदी ऐ।
- शिक्षा मंत्री सकीना इत्तू होरें आखेआ जे सरकार कालजें दी ढांचागत जरूरतां पूरी करने लेई लगातार कम्म करा6रदी ऐ।

मंत्री सतीश शर्मा होरें आखेआ जे डाइट तैहत गुज्जर-बकरवाल होस्टलें लेई 1 ज्हार 833 लक्ख रुपें दे ते पहाड़ी होस्टलें लेई 294 लक्ख रुपें दे फंड जारी करी दित्ते गे ना।

- श्री माता वैष्णो देवी श्राइन बोर्ड नै दर्शनी डियोडी गी परतियै नमें सिरेआ सोआरने मगरा उसी खोलने दी घोषणा कीती ऐ।

<><><><><>

CM-Militancy

मुख्मन्त्री उमर अब्दुल्ला होरें अज्ज आखेआ जे जम्मू-कश्मीर च आतंकवाद लोकें दे सहयोग बगैर खत्म होना नामुमकिन ऐ। उनें आखेआ जे उंदी सरकार प्रदेश च शांति बनाई रखने लेई ते सुरक्षा यकीनी बनाने लेई केंद्री गृह मंत्रालय दा पूरा-पूरा सहयोग देआ रदी ऐ। एहू गल्ल मुख्मन्त्री होरें अज्ज विधानसभा दी कार्रवाई शुरू होने सोआं पैहले असेंबली दे बाहरें पत्रकारें कन्नै गल्ल करदे होई आक्खी। कठुआ जिले दे हीरानगर सेक्टर च आतंकवादियें खलाफ चलाए जा रदे अभियान बारै इक सोआलै दा परता दिंदे होई मुख्मन्त्री होरें आखेआ।

<><><><><>

CM-IB Fencing

मुख्मन्त्री उमर अब्दुल्ला होरें आखेआ जे 144 करोड़ रपे शा मती रकम उनें करसानें गी दिक्ती जाई चुकी दी ऐ जिंदी जमीनां, अंतरराष्ट्रीय बन्ने पर तारबंदी करने कन्नै प्रभावित होइयां हियां। आकाशवाणी दे जम्मू संवाददाता नै जानकारी दिक्ती ऐ जे मुख्मन्त्री होरें आखेआ ऐ जे 155 करोड़ 8 लक्ख रपे मुआवजे दे तौरा पर रक्खे गेदे न जिंदे चा 144 करोड़ 12 लक्ख रपे देई दित्ते गेदे न जिसले के बची दी रकम जमीन दे मालकें दी तस्दीक होने दे बाद उनेंगी देई दिक्ती जाग। एहूदे अलावा बक्ख-बक्ख विधायकें आसेआ बन्ने कश रौहने आहले लोकें दी दिक्कतें-परेशानियें गी पुट्टेआ जेदे परते च मुख्मन्त्री होरें आखेआ जे उंदी सरकार बन्ने कश रौहने आहले लोकें दे मसले नवेड़ने लेई उत्थूं दे एमएलए कन्नै तौले गै अप्रैल म्हीने बैठक लाग।

<><><><><>

LOP

विधानसभा च विपक्ष दे नेता सुनील शर्मा होरें भारत च पाकिस्तान आसेआ आतंकवादियें दी लगातार घुसपैठ कराने दी कोशश दी निंदेआ कीती ऐ। उनें आखेआ जे सुरक्षाबल आतंकवाद गी पूरी चाल्ली खतम करने दे पूरे-पूरे जत्न करारदे ना। आकाशवाणी दे जम्मू संवाददाता दी जानकारी मूजब सुनील शर्मा होरें आखेआ जे एहू बड़ी मंदे भागें आहली गल्ल ऐ जे अजे बी किश नेता पाकिस्तान कन्नै गल्लबात दा प्रस्ताव रखदे ना। उनें एहू गल्ल कल कठुआ जिले च सुरक्षाबलें ते आतंकवादियें बश्कार होए दे टाकरे दी पच्छौकडै च आक्खी। उनें आखेआ जे पाकिस्तान इयां करियै अपने लेई मुसीबत बनारदा ऐ ते साहडे सुरक्षाबल पूरी तनदेई कन्नै एहदा बनकदा परता देआ रदे'ना।

<><><><><><>

Sakeena-Colleges

शिक्षा मंत्री सकीना इत्तू होरें अज्ज सभा च जानकारी दिती जे सरकार जम्मू-कश्मीर च नमें बनाए गेदे डिग्री कालजें लेई ढांचागत जरूरतें गी पूरा करने लेई सक्रियता कन्नै कम्म करारदी ऐ। आकाशवाणी दे जम्मू संवाददाता दी जानकारी मूजब मंत्री होरें एहू गल्ल अब्दुल मजीद भट्ट हुंदे आसेआ पुच्छे गेदे सवालै दे परते च आक्खी। उनें आखेआ जे सरकार नमें बनाए गेदे 50 कालजें च ढांचागत विकास लेई जिमी ते ईमारतें जनेही चीजें दी दस्तयाबी यकीनी बनाने लेई कम्म करारदी ऐ जेदे च अध्यापकें ते नान टीचिंग स्टाफ लेई कम्म रोजगार दे अलावा बड़ी बद्द गिनतरी च जिमी ते होर चीजें दी उपलब्धता यकीनी बनाना शामिल ऐ।

<><><><><><>

T.B Day

अज्ज विश्व तपेदिक दिवस यानि टीबी सरबन्धी कुल संसारी ध्याडा मनाया जा'रदा ऐ। एहू ध्याडा हर ब'रे 24 मार्च गी मनाया जंदा ऐ ते एहदा मकसद, आलमी सतह दी इस बमारी दे खात्मे आहले जतनें गी तेज करने दे कन्नो-कन्नी लोकें गी एहदे करी सेहत, समाज ते आर्थिक दशा पर पौने आहले माडे असर बारै जागरूक बनाना बी ऐ। एहू ध्याडा सन् 18 सौ 82 च डाक्टर रॉबर्ट कोच हुंदे आसेआ टीबी बैक्टीरिया दी खोज दी ब'रेगंड दे चेत्ते च मनाया जंदा ऐ। इस ब'रे इस ध्याडे दा विशे-सार ऐ - हां! अस टीबी गी खत्म करी सकने आं। अज्जै दे इस ध्याडे दे मौके पर इस बारै होर जानकारी दिंदे होई प्रदेश टी.बी अफसर डॉ. ज्योति जॉली होरें आखेआ।

<><><><><><>

Book-Released

मन्ने-परमन्ने दे लखारी ते अभिनेता जगदीश दुबे हुंदी त्रै डोगरी कताबें गी डोगरी संस्था दे सभागार च आयोजित कार्यक्रम दौरान जारी कीता गेआ जिनें त्रै कताबें गी जारी कीता। उन्दे नां न नोटिस, कनीज ते दऊं अब्दे इक्क पूरा। इस मौके पर डोगरी भाषा दे मन्ने-परमन्ने दे लखारी दर्शन दर्शी होर मुख परौहने हे ते .. दे साबका सचिव डॉ. अरविंद्र सिंह अमन आदर जाग परौहने। कार्यक्रम दी सदरत डोगरी संस्था दियां उप प्रधान प्रो. वीणा गुप्ता होरें कीती। इस मौके पर हिंदी लखारी डॉ. आदर्श होरें जगदीप दुबे हुंदे साहित्य बारै इक पर्चा बी पढेआ। आकाशवाणी कन्नै गल्ल करदे होई जगदीप दुबे होरें आखेआ।



Satish-Hostels

खुराक, नागरिक आपूर्ति ते उपभोक्ता मामलें दे मंत्री सतीश शर्मा होरें आखेआ जे जम्मू-कश्मीर दे गुज्जर ते बकरवाल होस्टलें लेई इक जहार 833 लकखूडा 40 जहार रपे जारी कीते गेन। एहू राशि चालू माली बरे दौरान जारी कीती गेई। एहू गल्ल सतीश शर्मा होरें जनजातीय मामलें दे मंत्री इफ्तिखार अहमद हुंदे भेठा दा परते च आक्खी। आकाशवाणी जम्मू संवाददाता दी रिपोर्ट मूजब मंत्री होरें सदन गी जानकारी दित्ती जे चालू माली बरे च गुज्जर ते बकरवाल होस्टलें लेई इक जहार 833 लकख 40 जहार रपे दी राशि च इक जहार 800 इक्क लकख 90 जहार मेजर हेड ते 31 लकख 50 जहार सब हेड तैहत दित्ते गे। एहू राशि 28 गुज्जर ते बकरवाल होस्टलें लेई ही जिंदी समर्थ 3 जहार विद्यार्थिं दी ऐ। पहाड़ी होस्टल बारै मंत्री होरें दस्सेआ जे 294 लकख रपे डाइट हेड हेठ जारी कीते गे।



Satish Ration Card

खुराक, नागरिक आपूर्ति ते उपभोक्ता मामलें दे मंत्री सतीश शर्मा होरें आखेआ ऐ जे झूठे ते फर्जी राशन कार्ड गी खत्म करने लेई सारे जत्त कीते जारदे ना। एहू गल्ल मंत्री होरें मीर सैफुल्लाह हुंदे आसेआ पुच्छे गेदे सोआलै दे परते च आक्खी। आकाशवाणी जम्मू संवाददाता दी रिपोर्ट मूजब मंत्री होरें सदन गी जानकारी दित्ती जे आम प्रशासनिक मैहकमे गी हिदायत कीती जे लाभार्थिं दी तस्दीक कीती जा जे पीडीएस डाटा बेस तैयार कीता जा। मंत्री होरें आखेआ जे तस्दीक करने आहली प्रक्रिया गी शुरू करने लेई निर्देश दित्ते गेन ते इस गल्ला गी यकीनी बनाने लेई आखेआ गेआ ऐ जे लक्षित ते सेई लाभार्थियें गी एहदे तैहत आहनेआ जा तां जे लारेक बंड सरिस्ते दे असली लक्ष्य गी हासल कीता जाई सकै।



SMVDSB-Darshani-Deodi

श्री माता वैष्णो देवी श्राइन बोर्ड नै दर्शनी डियोडी गी परतिए नमें सिरेआ सौआरने मगरा उसी खोलने दी घोषणा कीती ऐ। एहदे अलावा यात्रुं दी सुविधा लेई नमें तैयार दो मंजिला ईमारत दा बी उद्घाटन कीता। एहू सारा कम्म चैत्र नरातें दे पवित्र मौके थवां पैहले-पैहले करी लैता गेआ ऐ। एहदे अलावा श्रद्धालुं दी सुविधा लेई होर दुइं सुविधां गी बी बनाया गेआ ऐ। एहू सुविधा नां छड़ा रिवायती रस्ते दी खूबसूरती गी बदाउन सगुआं श्रद्धालुं गी बेहतर सुविधा उपलब्ध करोआने दी बोर्ड दी बचनबद्धता गी बी जाहिर करदी ऐ। इस मौके पर बोलदे होई श्री माता वैष्णो देवी श्राई बोर्ड दे मुख कार्जकारी अधिकारी अंशुल गर्ग होरें आखेआ।



PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 30 मार्च गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एहू 120मीं किश्त होग। कार्यक्रम च शामिल करने लेई लोक अपने बचार ते सुझाहू 28 तरीक तगर टोल फ्री नंबर 1800-11-7800 पर भेजी सकदे ना। एहदे इलावा लोक अपने बचार

My Gov ते नरेन्द्र मोदी ऐप पर बी भेजी सकदे न। एहू कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एह्दे कन्नो कन्नो एह्दा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एह्दा डोगरी च अनुवाद प्रसारत कीता जाग। एह्दा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>